

四庫全書

集部

欽定四庫全書

集部

滄洲塵缶編卷一至三

詳校官庶吉士臣瑚圖禮

主事臣呂雲棟覆勘

謄錄監生臣任溥

謄錄監生臣吳壽康

謄錄監生臣張曾壇

欽定四庫全書

集部四

提要

滄洲塵缶編十四卷

別集類三

宋

臣等謹案滄洲塵缶編十四卷宋程公許撰  
公許字季與一字希穎叙州宣化人舉嘉定  
四年進士歷官權刑部尚書寶章閣學士知  
隆興府事蹟具宋史本傳公許冲澹自守而  
在朝讜直敢言不避權倖屢為羣小齟齬不

安其位而去當代推其風節初不以文采見  
長然所作才氣磅礴風發泉湧往往下筆不  
能自休本傳稱所著有塵缶文集內外制奏  
議奉常擬謚掖垣繳奏金華講義進故事行  
世今皆散佚不傳惟永樂大典載有公許詩  
文題曰滄洲塵缶編又有公許自序一篇末  
署淳祐改元辛丑蓋公許為秘書少監時所  
自編也案公許當日所論列如應詔言事乞

留杜範乞還言官言蜀事四條請蠲和糴乞  
罷龔基先論徐元杰事諸疏宋史皆撮其大  
綱著于本傳其全文必更剴切詳明而詳檢  
永樂大典均未之載殆以內外制奏議諸編  
當時皆別本單行今惟文集僅存故其他遂  
不復見歟至古今體詩據自序本以一官為  
一集而其目為永樂大典所割裂原第已無  
可考雜文亦僅有序記策問等寥寥數篇尤

非完帙令姑就所存者裒輯掇拾分類編次  
釐為十四卷大抵直抒胸臆暢所欲言雖不  
以鍛鍊為工而詞旨昌明議論切實終為有  
道之言其格在彫章繪句上也乾隆四十六  
年九月恭校上

總纂官臣紀昀臣陸錫熊臣孫士毅

總校官臣陸費墀

自序

余自童丱從師習舉子藝業每竊窺古文章輒欣然慕之日課有程度稍閒則滌筆研屏處一室中試為詩章騷賦等作父兄密窺進而責之曰士生今世舍科舉何自致身而所嗜獨不爾得無左乎拱手對曰小子不敏敢不斂手於父兄之命雖然竊嘗聞之匠石為人營宮室小大廣狹圓方短長視主人所欲為度羣材會衆工以迄於成亦惟規矩繩墨運於心而措諸手者何如耳

若曰我能是我不能是奚取於匠石為父兄若然其言未嘗不深抑之也逮冠用志益苦嘗病記問不能過人而伐柯取則粗究端緒再貢里選充賦於類省主司皆竒其文以為脫去時文窠臼辛未忝綴末第自是始得肆力於翰墨之林蜀之儒先若後溪劉公鴈湖悅齋二李公浩齋楊公皆辱進之函丈指示繩尺而東南哲艾則有菊坡崔公昌谷蘧經二曹公先後推挽游揚引重是數先生者其學行風節薰炙日久所得不但文字而



已獨浩齋謂文非學者先務每侍坐必誨以蒙莊文滅  
質博溺心二語余固服膺其言勉自謹飭而宿習深痼  
文思一動伸紙濡筆颺激泉湧沛然不得而遏亦不暇  
於擇也日月邁矣甲子一周學不足以通古今才不足  
以勝煩劇謬當推擇職忝詞翰公暇閱所藏藁編盈箱  
累篋因取筮任以來次第編綴古律詩以一官為一集  
賦騷箴頌銘贊書序記誌表啓各以類相從奏篇謚議  
內外進退故事則自為一帙追念三四十一年間幼而壯

壯而老所遇有逆順所作有工拙固當搜剔龐雜采綴  
精英以必其傳之久披編一閱堅白同異無非前塵分  
別影事而敝敝然猶欲追記其一字一語之精與否勞  
形怵心老而不知息鮮不為遠觀之一笑乎蘧伯玉行  
年六十而六十化是以始於是之為非也寧如今以  
非之之為是也後日不又以為非乎余自中年喜交方  
外粗聞至道之要方當落華取實反求其一性之元而  
友朋尚欲索我於文字言語間用采陸士衡懼蒙塵於

叩岳顧取笑於鳴玉之句名其編曰塵岳併叙所以未  
暇蒐擇之本意友朋見者幸無強之以雲雷之飾責之  
以宮商之音庶幾萬一不以吳楚之僭取臯於當代作  
者是編成於淳祐改元歲辛丑之中秋嗣有譔述續綴  
右方程公許書於翰苑之摛文堂

王邁序

西山真先生文忠公不喜作詩嘗語門人曰予每不滿  
班史古今人物表且有感程正公且作第一等人之言

頃詮次聖賢別為一表以傳道者為第一德行次之節義又次之而後及於講明學術之儒先建列論議之公卿植立功業之將相曰循吏曰逸民皆品列臚分之若文藝則在數等之下詩又其下矣僕有請曰若然則刪後信無詩乎先生曰有之寬閒寂寞之濱寄興沖澹惟有陶靖節流離顛沛之際一飯不忘君惟有杜少陵其餘則有之不為補亡之不為缺先生雖不喜作詩而其言則深於詩矣今滄洲程公以道德文章之緒餘發而

為大篇短章無慮千百題方濯纓序滄浪偃蓋序僊谷  
覽峨眉象耳之勝吸錦江瀘水之清落筆成章神閑韻  
遠真之經曲阿游桃源及雜詩中所謂何其聲之似我  
君者旋罹兵旤脫身豺虎中冒瞿唐灩澦而東下也念  
家懷土雪涕行塗前有思治行後有感懷成都十絕可  
與北征同工異曲他如大地衆生愁暵死清風一壑可  
能專等句疊見層書極其惻怛謂非從窮年憂黎元嘆  
息腸內熱得乎使吾師文忠公見此帙必喜陶杜之後

有人矣抑僕所訝者年來評詩往往北面晚唐恍惚形  
似爭相位置共觀其自謂得意者其格卑而猥者其氣  
餒榮者其意纖以壯澁為平淡以淺俳為閒雅以要褻  
婉弱為得幽深之趣公則不然其勢雄健如靈鼉之擘  
泰華其步驟迅捷如峻坂之走銅丸時乎綺麗如晴空  
彩霞竒譎百態時乎蕭散如孤雲野鶴不受羈馭蓋其  
學饜經飮史含莊咀騷采掇菁華材料飽足故能兼陶  
杜之體而有之長袖善舞理固應爾詩乎詩乎晚唐云

乎哉僕非能詩僭為後序先之以詩說人必不以為非  
終之以臆說常有謂其嗜好背時老獨不改且笑且罵  
者公亦能為之解紛否臞軒王邁敬書

金史四庫全書

序



滄州塵缶編序考證

第四頁前五行 案思治行及感懷成都十絕永樂大典內俱已佚去今無可校補附識於此



欽定四庫全書

滄洲塵岳編卷一

宋程公許撰

賦

孔山賦

并序

少傅平章益國公喬先生應運挺生以宿學  
壽雋為國著蔡為善類司命皇上宵旰念治  
慨中外之多虞舉元祐盛典尊禮以示眷留  
而天下亦介公以眉壽康寧之福津梁四海

鼎台斯文是有關於世運者甚大非後學諛  
聞可得而擬議也九陽朔旦弧矢紀祥眉山  
程某以文字受知謹抒鄙思因公所居之野  
為孔山賦以祝千億載壽

客有自蜀趣吳徘徊瞻顧愕城闕之顯敞壯龍虎之盤  
踞屹帝閭之九重儼凝旒而當宁運臂指於百工託羽  
翼於四輔巋然一老之山立天使屏余以尊御有一德  
克享天心則殷保衡聽規諫以禮自防則猶衛武願擁

箕於舍人之門覲一覲於百官之富想德容之瑟個殷  
金石於音吐德盛豈易以形容故一言曰忠恕所謂言  
彌高而德彌邵華髮之為元龜者吾何幸而一旦遇哉  
意者運會所鍾穹蒼祐助景星卿雲轆轤而兆祥名山  
大川英淑之哀聚願從主人訂其然庶幾戴盆而快天  
日之睹主人於是斂容拜手而對曰子獨不見夫無極  
之初是為氣祖溟滓一散判而二五辨方正位咸有依  
據溫厚之氣盛於東南文物之興媿乎齊魯矧東陽之

奧壤分景燦於寶婺金華崢嶸而擅秀毅水滂洋而西  
注標乎一境之鎮曰孔山乃介然而中處吐吞煙霞蓄  
洩雲雨其大體則蛟螭結蟠其蘊異則鸞鳳騫舞聳檜  
栢以干雲霄艷葩卉以晞晨露下維五畝之宮猶崧高  
之降申甫皇肇錫以嘉名舉世莫能詰其故浮濟達河  
惟兗州百年南北之間阻擬岱宗之峻極悵未列於職  
方之譜幸斯文之未墜繫我公以宗主想瑞應於玉麟  
滄神光之繞戶繇初學而壯任一以聖賢為規矩經訓

厚其蓄奮心地築之場圃禮義以為佩服辭章以為繡  
組五十年進造之科晚乃由雍從而升政路念昔金困  
於韃蒙廷議頗惑於進取公獨軫憂於未然請力固於  
吾圍逮蔡息夾攻之師未旋而三京即謀於大舉搢紳  
蓄縮而拱眎公復慨然密陳於諫疏使忠謀獲伸於當  
時何遽嘗試於一擲之誤詢黃髮則罔有愆是宜皇明  
之悔悟二年首鉉乞身莫許優以辨章尊之保傅在昔  
元祐盛時有若臣博與臣著皆以宿德而尊重務禮貌

之隆則均然難易未可同日而語追想杏壇之將聖道  
大與時而齟齬固嘗嘆有用我者可使為東周憮然吾  
非斯人之徒與而誰與莫我知其奈何猶幸而樂正雅  
頌之各得其所美哉我公得君之專貴極而無改其素  
風雲翕合精神會聚稷契股肱周召心膂奎章八字之  
熒煌足以洗遺恨於千古客聞斯言頓首悚怖妄謂道  
之合不合時之遇不遇聖賢治之泊如來不迎而去不  
拒痛痒切於體膚獨遑安於寢寤祿萬鍾於我何加官



一品於余奚與慨世運之多難積事端之弊蠱刈葵遑  
復恤根本之傷樊柳何以為制狂之禦苟扶持猶可與  
有為袖手而亟尋於山墅繩愆糾繆以弼聖德進賢去  
佞以張治具戢貪舉廉以固民心選將練兵以銷外侮  
苟元氣之內充奚容邪之足慮諒宋德格於皇天壽喬  
松以作明堂之柱吾將見戰氛息於三垂祥風浹乎寰  
宇聖主恨無官之可疇訂師尚父之稱於太公呂當茲  
時也駕言返乎孔山味芝英而吸瓊醕孫曾列綵衣之

庭佩衿集戶外之屢詠舞雩之春風以壽斯文之脉縷  
論四代之禮樂以復治象於粹古使後覺咸槩範於六  
經而素域還通於率普小子不敏請因魯頌而誦之歌  
曰戎狄是膺荆舒是懲俾爾昌而熾俾爾壽而富酌大  
斗以跪獻於公千億歲而為衆父於是主人矍然而作  
請泚筆而書之以為孔山之賦

葛仙山賦

并序

余嘗讀孫興公天台賦觀其標竒領異雲興

霞蔚無言外玄趣冥與道會意竊慕之宰邑  
古唐昌一再因臺榭周覽岷山之勝作記及  
詩若干首紀載粗悉最後登葛瓚仙治巖洞  
深窈林巒竒峭賞嘆不足賦以識之固不敢  
睇前文人或可與山中道侶班荆商論耳

我思古人託吏為隱或避世而待詔金馬門或采砂而  
求補句漏令雖未能耦耕媿沮溺洗耳同箕頰賜鑑湖  
一曲如賀知章名山中宰相若陶弘景然觀其心樂天

遊跡與俗混冥機乎寵辱之途韜智於得失之境信與  
余而神晤竊太息以起敬繆撫字於一同幸福庭之接

畛間捧檄以周遊得探竒於曠靜聞葛仙之故棲擅西

山之最勝

李文簡公謂此山為西山第一

諏辰良月六矢標慶撫蓼莪

以含悽資塵露以報本問津白鶴之屯

山下名鶴屯常有鶴來棲宿

梯步青雲之逕眩采翠於羣峯劃蒼崖於千仞訊仙治

於寥閭爛金碧於絕頂於是靜慮凝神屏息以進門闥

巖敞陞級崇峻儼帝御於中天班列真於清禁颺輪泛

八會之音星壇繞虛步之韻訂靈跡於往牒肇葛翁之

棲道黛瀆巖泉之流

丹井自巖實注豬為一治甘寒不竭

王春溪確之

粉

茶粉亦葛仙故事

清塵嗣踵於蒲楊

葛仙之後又有蒲楊二仙

營定聿嚴

於韋尹

南康鎮蜀以本命道場興創此觀今遂為道場主豐碑具在

薦蘭燎以薰心

擷澗毛以寓敬上玄陟降於左右一念昭徹而響應朝

禮既周羽節前引環齋館於四阿繚丹牖於楹楯藹淨

侶之如雲競延客以淪茗莫不竹戶風清紙窻日罔

中觀

諸寮窻戶皆雅潔與他觀不作

陰栢壽之幽森羅怪石之嶷嶻遊目乎

泰初之鄰緩步乎北真之嶺

泰初為鄰一亭乃范潛所  
創張憲扁顏北真菴息齋

孝公  
所居

荒尋未厭林壑俄冥歸休風露之界洞酌玻瓈之

醞

風露界方大前  
閣山中酒極佳

清言中夕倦憩投枕暢遊仙之夢酣

愕震雷於龍箕起披衣而周眇浩一氣之溟滓覘紫炁

於白馬勺刀圭於丹鼎

白馬老君洞  
葛仙丹爐

二十四峯聯嵐而

競爽八十一洞歷遊而難盡乃借御於篋輿仍乞火於

束緼縱屐齒於蒙茸探洞戶於深靚風開煙闔霞捲霧

噴初鎔訝以偈仄俄披豁以幽迥冰凝鍾乳之溜玉立

巖壁之瑩或懸空以寶蓋或四匝以珠幃或捲綃於深

幄或繪雪於崇屏

已上皆狀萬  
仙洞之奇勝

步折旋而欲迷路若窮

而復遠豈余行之憚阻懼日晏而盍返悵簪紱之身縻

奈巖壑之味永引車躑躅回顧悽惋靜念覆載同一蓋

軫混淪初判於祖炁山澤潛通於玄牝妙大化融結之

工慨百靈走犇之駭不然何以盪磨日月凌駕參井毓

秀孕英棲仙宅聖俯仰四海如一家出入浩劫如一瞬

然嘗索至理於貝梵披玄機於瓊縕十方香水之剎海

九穹莽蒼之劫刃下風輪以持厚坤兼洪纖以該庶品  
飲之吾身納之方寸非古非今孰遠孰近吾將謹韁索  
於猿馬豁視聽於鼃黽被熏聲利之膏火遠避色塵  
之坑穽挹靈源以斟酌即寸田以耕壑觀六用於真空  
朝虛皇於內景當斯時也雖禦寇莫能詰其至遊七聖  
亦有迷於大隗而况人間之朽腐何異螻蛄與朝菌儻  
三仙可挾而遊尚吾言之有證

北定堂賦

并序



起部尚書眉山楊公以西清學士總戎左蜀  
作鎮三瀘開幕府之二年威令神行惠化川  
流民氣以和邊堦不警乃築堂於北巖扁以  
北定邑子程某竊窺盛心實與忠武侯尚友  
千載敢竭昧陋酌古揆今而為之賦若夫山  
川風物之勝登臨覽觀之樂非千里意想所  
能模寫他日操几杖以從尚書尚能伸紙援  
毫以為後賦云

客有遊於瀘而咤曰導江西來百川所宗內江附庸匯  
而歸東有國於斯屹屹其壙枕玉壘之崇岡帶三峽  
之怒洪控六詔為外拒羅萬山為四封由益州而下蓋  
節度府之最雄者也南定有樓曩昔誰初作鎮南服莫  
我敢抗瞻彼北巖崢嶸列嶂忽高堂之幻出抗霄極而  
顯敞揭北定之璇題隔川流而相向安得與子鼓柁乘  
流跼屣而上周覽面勢徵其扁榜有聞客言欣然而笑  
者曰子獨不聞諸葛忠武侯之事乎卯金之微霧塞颺

馳昭烈以帝室之胄間關百戰晚脫鞅於坤維天授雄  
圖傳之羽翼南陽之墟龍奮其蟄片詞乳水千載膠漆  
非不知鼎峙於一隅何以逞志乎中國人事有興廢天  
運有通塞當其輟躬耕之耒抱長吟之膝蓋伊呂王佐  
之儔豈管樂伯圖之匹彼有田一成有衆一旅乃能祀  
夏配天不失舊物而况蜀漢富饒高皇帝所以奠四百  
基業於磐石者哉五月渡瀘深入不毛以斬以夷以櫛  
以薙偉七縱而七擒奚天威之可逃蓋將定南方以恢

遠畧寧采薇遠戍之憚勞想其建旄設旛馮牙于征徒  
御嘽嘽有聞無聲峒溪縈曲篔簹竹阻深載清飈兮捲霧  
瘴注甘澤兮滌煙氛鏡歌鏗鈞凱旋獻俘乃息斂輸乃  
休卒徒顧神州而深曠慨妖孽之未除追渥惠於先朝  
忍棄捐於半途爾乃稱戈比干陳師鞠旅男子戰而女  
子運衆志一而義旗舉流涕抗表規復漢祚雜耕渭濱  
延頸子午凜規置之綽綽目何有於孱虜雖殘灰莫起  
於炎精然大義可伸於萬古揆今瀘川豈昔瀘溪蓋寓

名於都督之府使如心腹之運四肢王制所紀交趾雕  
題沐浴皇化蔽遮南垂委命下吏貢琛遠來繫撫御之  
得人屹金城與湯池中興四葉金運垂盡戍役未撤軍  
民交病乃眷西顧勢靡有定環劔以東瀘為重鎮疇咨  
邇列孰堪事任當斯時也起部尚書楊公方域弁垂紳  
拱備顧問再拜請行屏息惟命先皇曰吁汝無去朕予  
違汝弼幹我樞柄尚書於是九頓首固以請帝曰俞趣  
刻印入辭便殿欲別未忍灑宣勤之玉卮疊匪頒之宮

錦修門兮九重回首兮萬里十七年兮出入禁闥三千  
牘兮劇切黼屨步出晝以徜徉屯余乘其千騎茸纛兮  
金節彤幃兮轡組前驅兮塞途往開兮幕府風霆命令  
之信雨露德澤之普協氣洽而水紅並蒂有年書而繭  
粟同乳乃先事而防患乃整軍而經武籌帷密運莫余  
敢侮熟窺盛心固將尚友忠武侯於千古是則北定堂  
之建也豈必拱坐隅侍談麈而後詰其故也哉客斂衽  
而對曰北定取義則聞之矣地以人重子亦聞之否乎

蓐收御辰素煒中外珠履集兮紅蕖幕笳鼓沸兮細柳  
營尚書乃揮羽扇岸綸巾據胡床令三軍陳角觝簸紅  
旌射命中馬嘶騰程勇力簡伎能笑呼喧闐酒炙繽紛  
人百其勇惟所使令飲中樂酣投袂而起慨昔武侯南  
征道此千里馳驅僕夫瘁止獨我治朝聲教遠被誦弦  
比屋耕牧四履邊圻夕沉閣鈴晝閉上恬下穆可無事  
治奈之何南國幸安北塵騷屑龍蛇則山澤交興蝻蚌  
之陰晴莫決姦豪側睨以旁伺戰守一無於定說尾大

不掉財殫力竭孰能為國家刷渭橋之恥護金甌之缺  
志感激以思奮諒非余而誰責陟斯堂以遐觀髮上指  
而背裂使子斯時操几杖綴下客寧不慷慨激昂為尚  
書而擊節也嗚呼噫嘻今不與古並世事或與勢異宜  
忠武侯信於已而阨於運得於人而違於時蓋天厭漢  
德之日久故大厦非一木之支於皇藝祖得天下以仁  
聖聖相傳翼翼繩繩嗣聖御圖側席雋英天其或者相  
興復之景運錫勇智於大君總乾綱以獨斷闢泰途以



景征揮氛翳於九有耀景光於太清恢張聖德圖任舊  
人愚竊料尚書之德業庶幾乎周室之甫申弼宣后以  
復古何王業偏安之足云小子不敏敢誦所聞酌大斗  
而祈耄耄跪敷衽而祝升平乃歌曰王遣申伯路車乘  
馬我圖爾居莫如南土載歌曰四牡騤騤八鸞喈喈仲  
山甫徂齊式迺其歸客曰泱泱乎歌矣哉德盛者非斯  
文無以被金石功高者非斯文無以流管弦請濡毫於  
三瀘之川磨墨於三瀘之山書以為北定堂之賦而附

之崧高蒸民之篇

幽思賦 并序

賦以幽思名幽憂而慨所思也所思維何有  
宋華文閣學士光祿大夫陽安侯後溪劉先  
生也先生之薨以嘉定十五年六月十四日  
葬以明年三月十八日門生程某幽思無涯  
倣楚騷之大招以聲其哀也維先生言為天  
下則行為天下法人無知愚皆知為君子之

中庸正色立朝難進易退孔子所謂大臣以  
道事君不可則止者先生其人歟太史編摩  
奉常節惠萬古傳信國有彛章承學鄙儒敢  
犯不韙摹繪日月伏念攝齊升堂歲一周星  
先生不以為愚許其與於斯文孜孜誨之曰  
資稟自天充養以學子其勉之某頓首書諸  
紳間嘗執訊請益顧謂小子知慕古文削牘  
薦朝可使備數從搢紳諸儒以鉛槧於萬一

某懼不敢當也辛巳春晉拜全德里第德容  
穆若黃髮皤然而憂天下若己之飢渴迨安  
輿就養古涪某職勸學從事從容撰杖屨又  
得聞所未聞爾乃肖壽象於學官率諸生北  
面再拜簪弁雲集衿佩肅趨講經乞言飲酒  
序齒藹乎三代之餘風居無幾某奉行臺榭  
北度劔外四閱月得手書一甫趣之旋而凶  
問踵至矣嗚呼哀哉哲人萎邦國瘁矣人百

其身莫可贖矣天降酷罰陟岵痛鉅苴經銜  
恤匍匐愧古想素車千兩會葬清溪之岡形  
留神馳傷父師之逝而藐余小子之無依也  
拊膺一慟而賦之其詞曰

閔吾之生離阨今天降割其孔殷父我鞠師我誨今逝  
將託焉而終身粵龍蛇之歲度兮梁壞悲乎哲人颺颺  
風木重以哀兮上下求索又莫覲於吾親既縣封而反  
虞兮感陽春以增悼西余首悲無涯兮俄遠日之余告

嗚呼先生兮一朝倏然其何之其生有自來兮其死必有歸望寢門已疏兮安所得而陳詞鳳凰詔而翼車兮軼浮雲乃曾舉周流四極經營八荒兮渺不知稅駕之奚所抑將弋絕炎儔傳說以綴列耀兮無乃噓紫炁謁柱史而扈西征憑緒風以誰訊兮九天不可梯而升佇影響之不可得兮杳茫茫之不可明士一善斯可錄兮矧衆芳之能并皇皇仁義之廣居兮坦坦道德之九遠苟肖形皆可與為善兮志皓首而不衰春秋八十有

一兮士渠窺而國著龜隘世路莫能久此淹兮趨無為  
隣秦始其奚疑竊悲夫五百年之間生兮艱於遭遇而  
易失德容玉瓚之黃流兮斯文清廟之遺瑟氣盈虛烏  
可常兮道污隆又何能必逝川不可挽而回兮後將焉  
所考德世坎窞日阽危兮俗冥行而莫止悵已往之莫  
追兮惕來者之將躓天蒼蒼莫可詰兮胡一老之不慙  
遺震余衷而私有感兮憶往日春糧而求仁聞一言曰  
充養兮書諸紳今十年再跪履於里門兮願卒業乎涪

濱北面拜手槐杏之陰兮吾今而知師道之尊紛戶履  
之三千兮奚狂簡之下取愕風雪之詠歸兮變薤露之  
惻楚哭匍匐以無因兮塊獨茹哀於廬處愧端木之事  
師兮躑躅六年而不忍去苟逝者而有知兮尚觀過而  
我恕嗚呼哀哉三石孱顏兮後溪之堂萬松蒼翁夢兮清  
溪之岡子孫兮孺慕歲時兮烝嘗化鶴歸兮何時山差  
我兮流水洋洋睨故邦兮蟬慶尚弭節兮相羊千秋兮  
萬禩先生兮不亡



南樓賦并序

武昌在今為上流巨鎮南樓得名以庾公重  
雖風流邁往而勲業無聞焉悅齋先生李公  
由館殿瓌望久更外庸上念荊州已試之績  
醕沫水南定之功陞直圖書載頌英蕩就領  
征鎮以世厥官推平日經綸之盛心運神州  
規恢之長算以一洗江左之陋其在是行門  
生程某追送江干想南樓偉觀恨不能壯翮

而從也詠歌不足為賦以獻

帝奠國於南服迤長江以設屏紛裂土以作鎮錯犬牙  
其接畛考形勢之雄峙壯武昌之名藩扼上流之要衝  
天設險之自然偉南樓之顯敞壓睥睨而連騫曲雕楹  
之縹緲翼繡藻以回旋蔽虧日月吞吐雲烟曼余曩賦  
於遠遊心軫紆以煩迷想危眺以流豁企斯樓而神馳  
於是落風挽振霞袂緣百雉之叢葉倚層軒而矚睇悵  
南北之瓜分獨惆悵而累欵風號怒兮浪翻空日晡曖

兮雲改容弔江右之陳迹溯元規之緒風想其羽衣褊  
褊佩玦鏘鳴據胡床以笑傲鑒月采於空明雖老子之  
興復不淺而奈何西風之塵汙人也嗚呼介吳楚而建  
國匯江漢以為池控淮甸之平行回大別之嶽巖上洞  
庭之深阻下九江之淼瀾地非人而莫守是為委金湯  
而棄之我宋南渡鑒在典午眷此重鎮為國之阻括湖  
外之轉輸寄千里之鎮撫孰能屹一面之長城守北門  
而卧護有天下士巽巖之子其翰墨發揮如芳葩之麗

春其丰神灑落如璧月之湛水磅礴乎萬物之表輔藉  
乎羣士之軌曩雙書於天祿儼正色乎朝端孤忠表乎  
獨立百壬為之熱顏竟柄鑿之難投遠修門其幾年秉  
嫖節以事君何中外之間然夫文以緯國學以用世舍  
是而求土苴而已自非括今古於方寸何以融體用於  
一致卓哉我公周情孔思險夷不能揉其操仕止無以  
奪其志使之謀謨廟堂必蹇蹇以匪躬經綸宇宙固恢  
恢乎餘地彼其七縱七擒使敵人繫首請命於下吏

者此特公事業之緒餘耳皇明燭遠萬里如見陞圖書  
寓直之華仍禮樂使華之遣輦車驪駕爍風采於雲煙  
高牙大纛振籌策於方面吾想夫南樓之上翠琰深刻  
爛巽巖之遺墨媿雄深於古作今也江山眩耀烟雲雜  
沓先聲隱咄三軍改色坐嘯事簡觀風時隙驅貔虎於  
列屯出驪駟於華樞擁珠履其雜遝粲雕俎其繁飾旗  
建十丈鐘撞千石駐目鸚鵡洲以酌正平之英魂流盼  
烟波江以弔崔顥之詩魄酒中樂酣乃命武士駕樓船

棹蒙衝颺輪激濤粉雉翔空出沒蛟蜃悲嘯魚龍嚴武  
衛於整暇壯尊俎之折衝豈徒襲守江之誤計抑將收  
北定之成功豈與夫詫石頭成就而貽難於賊峻倚方  
嶽道勝而過猜於茂洪昧經邦之遠畧而矯迹以風流  
者同哉皇帝坐宣室思賈生悵去國之日邁軫朕懷其  
不寧盍賜環以趣歸呼順風以揚舲邀修門其九重寧  
虎豹之復獐矧苗裔之蟬聯評家世其第一鴈湖夜雨  
之蕭瑟鶴嶺秀氣之鬱積紅藥翻兮北門紫薇爛兮西

掖汗簡青兮蘭臺鼎鉉調兮台席平武兮天朝舊物兮  
世職蹇余生之落寞尚玻璃之味同企龍門其千仞願  
為御而無從金躍冶以成鑄玉蘊璞以希礪步躑躅兮  
江沚意欲往而忡忡望南樓其何許眇天末之孤鴻援  
長毫以欲賦慙抽思之匪工綴余佩兮瓊枝爰余冠兮  
芙蓉何當借以樓頭之黃鶴送以九萬之順風竦身以  
攀若士之袂而一遊夫蓬萊道山之宮也





欽定四庫全書

滄洲塵在編卷二

宋程公許撰

擬騷

擬九頌

鴈湖先生李公以嗣世之賢為儒林哲匠參  
貳幾政協謀鋤姦功不自言橫遭媚嫉賦閒  
歲久學日充德日進旱霖川航四海係望公  
許嘗竊論楚臣九章九歌傳者謂其託陽數

以陳詞悃悃款款之忠一篇而三致意庶幾君之一悟而國賴以安非私於為己也雖楚詞有詩人主文諷諫之義而頌以美盛德之形容斯文之作體則騷而文則頌無乃不類乎鴻飛遵渚吾黨望於公者雖累詞千百安能摹倣其萬一是則託楚騷紀陽數表公之志頌公之德於古人託物引類之義或有取焉耳

龍吟兮九淵鶴唳兮九天飛僊兮下寥濶鶴可馭兮龍  
可鞭白雲兮空谷飛泉兮鳴筑掇瑤草兮帝庭寡瓊林  
兮木末問老僊兮何為珠庭宴兮悅怡啓瓊笈兮探道  
帙眄靈童兮徃授之粲僊李兮芳奕葉主斯文兮千歲  
期維嵩嶽兮峻極繄甫申兮孕質彼圩頂兮尼丘非毓  
聖兮何述偉茲山兮萬仞獨載英兮一家下培塿兮何  
有上帝闔兮可排龍奮鬣兮翔騫鶴整翮兮褊襪灑瓢  
滴兮澤苗槁何蕙帳兮吾久淹

右龍鶴山

馳余馬兮南北慨永懷兮故國豈喬木兮吾敬繫世臣  
兮取則許史兮金張煜煜兮煌煌薰天兮富貴達觀兮  
糝糠水有源兮木有本傳不傳兮天若吝彼高密兮崇  
門後何稱兮子孫維指李兮蟠根光萬丈兮斯文父子  
兮昆弟面命兮叮嚀闔戶兮車不停軌滿堂兮烜朱與  
紫顧所重兮未然寧以彼兮易此佩禮義兮服詩書保  
厥美兮久不渝百世兮嗣守張赫奕兮吾閭守一經兮

範金石寧鄭公兮專通儒

右通德門

修眉兮連娟曼翠靄兮麻源君門獐兮九虎蹇予留兮  
三年三峨之山兮遠萬里見似人兮胡不喜半輪秋兮  
促公歸空高徑兮班屐齒蹈夷險兮一心既何戚兮何  
欣忍較功兮曲突莽蒼狗兮白雲清風颯兮綺疏明月  
耿兮庭除紛縹帙兮挿架尚青衿兮來趨渺天涯兮延  
佇時與拂兮蠹魚雪堂兮躬耕萬古兮芳馨匪天窮兮

人厄九鼎重兮斯文

右峩峩書院

水平湖兮溶溶鴈鳴秋兮  
離離氣相求兮聲相應渺萬  
里兮葭葦叢晴雲淡兮天  
宇清行不亂兮字縱橫伊  
美人兮心和平韻塤篪兮  
錦繡文湖光澹兮酒溫卮  
鑑湖影兮燭鬚眉縱百坡  
兮何聚散如此水兮湮不  
緇彼弋人兮奚慕何南北  
兮定處嫋嫋兮秋風瀟瀟  
兮夜雨飛鳴兮向陽何心  
兮稻梁望層空兮接羽友  
鴻鵠兮高翔

右鴈湖

貌稜層兮心潔貞玉韞質兮金作聲芙蓉冠兮獨立佩  
寶璐兮繽紛胡拳拳兮石友期歲晚兮相守瞠俗眼兮  
老醜自心知兮堅久彼平泉兮森離立紛品第兮羅甲  
乙吾何嗜兮捐介寧與汝兮同癖琴書兮左右龜鶴兮  
前後覲面兮崢嶸忘言兮一笑泰山兮非大拳石兮非  
小體無不具兮性何不有喁喁兮層霄藹膚寸兮澤九  
州時卷舒兮為世亘古今兮獨超

右石林

葵傾心兮向陽車導迷兮指南彼赫曦兮麗晝奚信耳  
兮銅盤路通行兮九軌奚窘步兮嬖姍理有窒兮必通  
物無幽兮不闡懿君子兮媵修曾何心兮獨善曼余目  
兮流觀瞻咫尺兮威顏慨冥行兮一世撫余衷兮獨安  
惟納約兮自牖苟墻面兮孰誘擁前旒兮余察昏適埴  
兮余考周道兮如砥君子兮所履彼矇叟兮何知跬步  
兮千里倚檻兮永歌君門九重兮奈何倚皇明兮寤鑒



蹈前修兮不頗

右南閣

滄海兮渺瀰杳莫見兮津涯愕風濤兮瀕洞問靈皇兮  
何之天蒼蒼兮正色水混混兮相接何人心兮過險陟  
平陸兮震懾維水流兮不盈縱涉險兮心亨亦可載兮  
可溺毋以弱兮意輕兀漏舟兮澎湃矧維楫兮不戒羌  
左重兮右輕曾何恃兮弗敗引余袂兮褰余裳整余施  
兮岂余檣舟中人兮乃心一險可濟兮患可防乘流兮

上下如平武兮康莊思古人兮莫我選志尊堯兮慨以  
懔固天命兮有當繫人謀兮允臧

右平舟

東方兮煌煌烜吾目兮晨光耳翰音兮三唱屏羣英兮  
遠藏攬衣兮起起危檻兮徙倚寧餐華兮學僊何炙背  
兮誇美衆鼾睡兮昏莫知我心惻兮獨徘徊胡義馭兮  
不少尼恐君行兮迫崦嵫晞余髮兮扶桑騁余乘兮賜  
谷翫咸池兮洗光佇閭闔兮開鑰建采旄兮飛虹駕蜿

蜓兮八龍鸞鳳兮前導靈鳥兮後從於微閭兮發輟景  
未仄兮帝宮及曜靈兮未晏尚察余兮從容

右朝陽閣

桑枝綠兮麥齊腰醴泉山下兮春和柔有美一人兮山  
之曲薜荔屋兮蕙凋溪流兮清瀏嵐靄兮穠秀鳥語韻  
兮清風花氣馥兮晴晝山中人兮袞繡衣汎濫游兮愴  
忘歸漑千頃兮芳莖藝百畝兮留夷歲暮兮華實折以  
遺兮所思懷渺渺兮何極時不可兮再得丹鳳兮飛飛

何兩美兮未合  
山中人兮忍淹留  
皇渴佇兮石田秋  
樂行兮憂違  
余心兮焉求  
草萋碧兮日婉婉  
炯四目兮余袂挽  
披霞縕兮紉瓊編  
倚僊翁兮與周旋  
樂莫樂兮醴泉之墅  
役薪水兮公忍余棄  
凌汎景兮從之遊  
渺下顧兮一稊米

右醴泉墅

述九頌

嘉定十二年春西師弛備敵騎全入天漢三

泉洋川蜀大震上用心惻始下詔圖任舊人  
起前參知政事眉山李公於洞霄祠館以端  
明殿學士知遂寧府未就鎮潰兵嘯聚自利  
閬果擣虛入城公乃弭節潼川與季弟左史  
直院侍郎公共議招降以伐其闕西之謀賊  
始疑沮逡巡引避用能延景刻會將士以蹙  
之賊固為吾机上肉矣兵火創殘流離未復  
公始至是究是圖俾就安集民遂德之家置

一喙先一州而後天下挽天河以洗兵甲蒼  
生屬望於公不啻旱秧之渴雨先是歲行丁  
丑公初度之臨也公許嘗賦擬騷九頌為公  
壽公讀之喜謂其文駸駸乎子駿與可伯仲  
之間愚不敏懼不敢當也今歲己卯公之壽  
籍方周一甲子而雨露疏恩適丁斯時泰道  
初亨壽雋登用紀年太極自當與宋匹休公  
許感公文字之知不敢碌碌自比常倫再抒

鄙思為述九頌九章章各有指所以侈公道  
之開而申前作之未備繪畫日月非僭則狂  
愛助之情則在可取是歲十一月既望門人  
程公許拜手謹序

五氣兮順行萬彙兮嘉生繫人兮有異毓其秀兮最靈  
紛總總兮橫目何一濁兮一清豈后皇兮爾私命曰賢  
兮粹精雖才品兮靡易匪先覺兮曷程誕空桑兮開有  
殷崧嶽降兮周之禎矧皇運兮配天作之輔兮差肩藹

遺芳兮簡編屹柱石兮多賢眷指李兮嫡裔祖柱下兮  
老僊扶輿兮瑞霧溶洩兮非煙鞭鸞兮馭鶴扶雲漢兮  
來九天粲文瑞兮郁郁帝所賚兮坤軸經天兮日星緯  
地兮嶽瀆縣萬禩兮不泯為生民兮耳目

右毓粹

岷山兮五嶽丈人大江兮四瀆之尊羌鬱積兮佳氣固  
人物兮載英環兩川兮千里何江鄉兮專媿滙千頃兮  
玻瓈龍與鶴兮集止山之隱者聃耳孫子正見兮楊氏



女乘汎景兮軼罡風  
藹僊蹤兮山之趾  
稟帝命兮叢霄  
聊世人兮遊戲  
五男子兮翹英  
今崑崙兮鼎峙  
彼談遷兮世史  
官悵有歎兮梟  
及季真人兮高翔  
眄塵寰兮批糠  
憫俗兮愠瞽  
褰余佩兮熒煌  
老翁泉兮龍鶴  
之雲前  
蘇後李兮藹芳馨  
岷可礪兮江可竭  
不可沫兮英與靈

右載英

天不祿兮斯文寄命脉  
兮哲人爛咸陽兮焰虐不可燬  
兮六經苟日月兮可晦  
何天地兮長存言不文兮行不

遠義欲正兮詞欲瞻學之荒兮氣之浮匪艱深兮必蹇  
淺公昔來兮帝旁佩瓊蕤兮雲錦裳六龍兮伏軫從之  
兮彩鳳愍世兮溷濁下掃兮不祥屈宋兮導前卿雲兮  
翼後韓柳兮並馳杜李兮齊驟建安七子兮隨行江左  
諸謝兮羅左右抗吾旃兮典籍場軼吾轂兮風雅園探  
金匱兮秘圖挾國華兮冊書範金石兮揚律呂散人世  
兮猶緒餘民之生兮有司命彼指南兮亦有車秉斯印  
兮千萬壽後有覺兮余楷模

右經文

郊見帝兮琮璜瑟彼瓚兮流斯黃物有專兮靈粹寧糅  
雜兮尋常懿君子兮毓德可蠹測兮蘊藏稟堪輿兮間  
氣學遠紹兮皇王探墜緒兮鄒魯集阜夔兮衆芳俗夔  
夔兮要艾紛余佩兮蘭纒衆檐檐兮冶服爛余裳兮織  
襄石渠兮紫橐斗樞兮黃閣持衆美兮效君寧濡跡兮  
康國世懣懣兮莫吾與矯茲媚兮私處畦於閭兮珣琪  
藝瓊蔬兮元圃曖晴旭兮養和霏瑞霧兮來下苟昭質

今莫虧猶可遺兮遠者及義鞭兮未晏導帝之兮軌路

右耀德

蘿門兮薜戶宛其姝兮靜女撫瑤瑟兮清歌歌不絕兮  
如縷事君子兮歲幾何薺非甘兮藟非苦金石兮貞心  
恩深兮雨露豔半額兮姱倡豈娥眉兮能媿山之顛兮  
虎豹嗥波洶洶兮蛟龍饕君欲行兮孰導隱余思兮鬱  
陶願一列兮無從首倦櫛兮頻搔寶輅兮瑤轍道阻兮  
積雪君何志兮遠遊危斷綏兮愒愒歲冉冉兮將道蹇

奚淹兮山椒愕噦鳳兮戾止曰有詔兮汝謀日有食兮  
仍曜景有晏兮復朝苟蓀愛兮弗諼聊延佇兮中洲

右亮節

蚩尤旗兮飛矣天狗墮兮隱雷天運兮日蹙目漲兮氛  
埃一失兮一得孰強兮孰弱莽三垂兮骨縱橫恣強敵  
兮橫奔突天萬里兮杳莫知何一朝兮飛羽愕皇乃眷  
兮西顧愴赤子兮何負白駒兮來思忍空谷兮逸豫有  
俶兮東方千騎兮煌煌淑旂兮綏章往欽兮汝臧膏余

車兮秣余馬遲汝不來兮盍整余駕忽霧塞兮颺回梗  
綠林兮轉藉不我後兮我前幸劫災兮天假怒轍兮徒  
勞鼎魚兮焉逃民生兮何尤膏火兮煎熬蛟涎兮脫禍  
父母兮鞠我集鴈兮中洲作之屏兮蜀之左內訌兮外  
阻誰禦兮誰拒膚寸兮鬱遙岑先一州兮後天下

右固屏

翁淪兮澤有水渺莫窺兮涯涘鼓之雷兮噓之風沛萬  
里兮流莫止瀉濤瀾兮汎東洋張乾綱兮翕坤紀渺觀

兮古今賢運兮齊軌狼跋兮其胡赤烏兮几几東征兮  
遲遲滔滔兮不歸歸來兮何時繡裳兮袞衣美人兮嫵  
好思不見兮令人老昔與余兮成言忍棄之兮異道九  
疑兮緬哉重華兮宴娛蒼龍兮峙闕峒堯兮帝臺蕙綈  
兮芷幄從之兮九垓麾青虬兮以梁驂孔鸞兮以駕靄  
雲旂兮繽紛恍松喬兮來御步咫尺兮帝軒帝一笑兮  
何言恍流盼兮下土掃埃氛兮九埏余左兮汝右余先  
兮汝後汝作朕兮股肱拜稽首兮皇萬壽

右入輔

一之日兮周正建子兮良辰黃鐘兮起律魯臺兮望雲  
氣機兮翕闢往來兮不傳皇揆予兮初度秉幼志兮潔  
貞延日月兮察幽晞雨露兮淪氛蓀拳拳兮余愛何險  
艱兮弛勤與蓀違兮星紀思專專兮曷已九折臂兮成  
醫信情質兮可恃端策兮以占有孚兮韋編陰極兮陽  
復豈賢運兮不然矧甲子兮一周測天度兮循環丹臺  
兮定錄壽紀兮日延理無窒兮不亨物去故兮就新蠖



屈兮求信根之歸兮再榮彼涸陰兮毓質亦忍俟兮陽  
春洪鈞兮密庸播物兮無垠開八荒兮壽域如華胥兮  
大庭

右紀生

天門開兮九重爛鈞陳兮紫宮烜舜瞳兮萬里穆五絃  
兮從容予唱兮孰和勞心兮懣懣渺煙塵兮蕭瑟慨世  
途兮荆棘上帝兮孔仁賚予兮良弼金碧波兮漲漪淪  
妖氛洗兮景氣新皇軫思兮六合佇公來兮經營天蒼

今地厚日月兮悠久民命兮以延國脉兮以壽雲鬢鬢  
兮僂者家瑤之臺兮戶瓊玖飯寶屑兮醴玄霜脯擘麟  
兮果梨棗馭鶴兮鞭龍故山兮春風吾誰侶兮赤松匪  
上玄兮曷從撫塵劫兮浩蕩燕鈞天兮樂融長接引兮  
羣品與龍漢兮無窮

右侶真

古詞

亨泉詞

亨泉詞眉山程公許為常博張侯賦也侯家  
資陽考槃蓮花峯下坎地得井竅木以成有  
冽且寒昔堙今滌以亨取義而為之銘宿學  
鉅公咸有紀述肅容伏讀靈源至味挹注不  
可窮顧後生何敢與於斯文疇昔承教下風  
所願求益倣楚騷體作亨泉之詞若曰紉艾  
擷蕭祈頡頏於飛霞之佩則公許所不當僭  
有闕兮寒泉運而往兮幾何年地靈兮啓秀不我後兮

不我先川媚珠兮圓折蓮吐岫兮便娟坤文郁兮瑞世  
所思邈兮西都之虞淵芳至今兮未沫世載英兮昌維  
其已考槃兮山之阿龜何以兮食只築之垣兮登登忽  
而凹兮窈而深累甃兮尋丈剝木兮虚心木為仁兮仁  
者靜水闕險兮中不失信矧生數兮土以培固受命兮  
獨也正孰牖兮孰窒孰導兮感涕否傾以亨兮繫所遭  
余何喪兮何得美人兮委蛇澗酌兮永歌昔泥不食兮  
匪我吝今滌可汲兮湛不波韋絕編兮堂上晤三聖兮

惆恍有孚兮坎習不窮兮并養消息兮盈虛道之體兮  
易之象沛吾軻兮八荒志拯溺兮靡遑雞鳴喈喈兮霜  
月曉紛紜歸夢兮殷轆轤之下銀床萬家兮渴飲渺千  
里兮相望猿奚悲兮鶴奚怨旱欲霖兮川欲航功成兮不  
居媿彼泉兮有常纓可濯兮滄浪鯉可羞兮漢之姜修  
綆兮汲古澆新學兮肺腸美人兮歸何時樂莫樂兮舊  
鄉

儂谷詞送別西憲楊少卿奉祠東歸

攬飛雲兮遐思軼迅飈兮流目涪之水兮渺瀰祕殊境  
兮僂谷彼僂谷兮何有辟埃氛兮沈寥森幽篁兮擁翠  
翳嘉栢兮相樛路窈窕兮山盤紆田可稼兮谿可漁谷  
中人兮歸何時霧冥冥兮雨霏霏人心洪濤兮衝君航  
世途羊腸兮墮君馬蓋舍策兮停橈聊相羊兮田野蘭  
室兮蕙凋鶴舞兮猿嗥君歸來兮何樂澹無取兮焉求  
敷床兮千萬軸問何如兮嶽之麓慨視世兮搶攘忍潔  
身兮幽獨谷中人兮無淹留靄膚寸兮澤九州芳菲菲

今未沫期歲晚兮逍遙

撰先伯桂隱先生哀詞

伯父桂隱先生以嘉定十一年正月十三日  
卒於丹稜之里居後十二月十七日葬程氏  
自唐入本朝號眉山望族曾叔祖夔州府君  
由上庠擢政和二年進士乙科浮沉州縣間  
以學行為縉紳榘範叔祖飛烏府君早世不  
克大耀先生夔州嫡長孫飛烏嫡長子也生

長見聞嫻於禮度非詩書不嗜非道義不友  
終老韋布為鄉達尊家君子蓋先生之親手  
足稚齠出繼友愛尤洽公許每歸鄉省墳墓  
拜先生堂下丰神散朗談論瞻博其卒且葬  
也不得一慟以寓其哀先生早悟道家祕訣  
形留神往豈真死者乎乃倣楚人之詞為文  
以招之詞曰

丹山之巖兮阻且深丹山之雲兮閔其霖中有姝兮靜



處冠岌岌兮瑤簪方轍兮坎滯聊返轡兮穹林辛夷兮  
為屋芷幄兮蘭衾世與我兮異好不可揉兮精金信有  
味兮恬漠亦何怨兮寡朋猿噪兮鶴憤鳥悲兮蛟吟忽  
西崦兮墮日急響絕兮玉琴載營魄兮焉逝空桂枝兮  
蕭森朔風兮陵厲白晝兮多陰素車兮丹旆曷返兮遙  
岑天高兮地厚古往兮來今彼達觀兮超曠奚死生兮  
愛憎四方兮上下杳眇兮莫尋鶴歸兮何日瑤草碧兮  
勞我心涕浪浪兮霑襟君無滯兮遠淫歸來兮娛樂故

山兮峻嶒

安人趙氏哀詞

安人趙氏故大丞相衛文定公之季女今朝  
散郎主管建寧府武山冲祐觀虞公之妃嘉  
定七年六月十一日終後二年九月二十七  
日葬公鍾情嘉耦述文誌墓語皆傳信眉山  
程公許倣楚騷之亂為詞以相挽者以寬公  
之悲云

商飈之蕭瑟兮百草莽其披離何深林之敷蕙兮藹芳華  
其不虧物有生而專媿兮豈伊人而不然閬瀛房其窈  
窕兮非從夫將孰稱賢媚璇源之駛瀏兮四僊之峯其  
巖業袞衣藹其碩膚兮并珈配之煒暉有齋季女淑且  
明兮天作之對奚苟求懿玉屏之有孫兮嗣寬閒之潔  
修面嘉命其必敬戒兮庶幾君子之好速歌福履之將  
兮詠室家之宜敝屣珠玉吾何有兮佩禮義而服書詩  
顧俗好之鶩榮兮得則盈而失則沮媿君子其獨不羣

今期百歲而偕處夫何孤鸞一朝而舞鏡兮悼亡賦而  
鬢霜念天秩之有典兮幽明離隔其忍忘冷辟邪而燼絕  
兮疊旁行其蛛螽耿松岡之夜月兮尚欣欣以從舅姑  
之遊悼人命其孰司兮參大衍其非天信流芳之未沫  
兮豈獨華髮而曰壽苟天理之可恃兮君子之步其丹  
霄湯沐大國日可冀兮尚足慰芳魂於一丘

欽定四庫全書

滄洲塵缶編卷三

宋 程公許 撰

四言古詩

明裡進戒詩

臣公許言伏覩皇帝陛下改元端平躬親政  
事之三禩大饗明堂以報以祈竭情致敬先  
期格於道祖即以是日齋太廟詰朝薦裸月  
星明概乾坤清夷逮玉輅言旋齋宮都人夾

道瞻望天顏睟穆嘉氣扶輿中夕雷雨交作  
於乘輿未興之前而小霽於降神盥奠之際  
意者雨露風霆無非所以為教皇皇帝后於  
吾君顧歆警戒其仁愛之至歟熙事告成聖  
心加惕詔有司卻步輦輟班賀免御樓所以  
敬天威銷青沴祈祥也後四日申詔避殿減  
膳孚號告廷以禮拜罷明智天運威斷神謀  
列辟退朝舉笏相慶不期乾道淳熙之氣象

復見於今臣列屬奉常預觀容典深惟陛下  
欽畏圖治之心凡百臣子當知所以將順規  
戒效塵露於海嶽謹做周頌敬之之義撰成  
明禋進戒古詩一章凡二百四十六句繕寫  
進呈懇懇精忠惟陛下裁赦

於赫圓宰視聽自民惟聖能饗非德莫親乃眷炎宋受  
命以仁十有三葉涵海毓春德厚流光施及吾君厯數  
有歸兆協大橫性篤孝恭天縱睿神思皇帝統積累艱

勤譬彼苗田是播是耘遺大朕躬曷其敢寧嗣訓九年  
端拱嚴宸權綱復歸如日宣精姦儉投荒耆哲揚廷與  
物更始三載惟寅宗祀戒期歷吉中辛孚號萬方以肅  
先庚飭我玉幣潔我染盛秋霖淫泆俄泆六旬法宮祇  
懼虔祈百靈爐沉未燼如谷應聲颺籟號起霧裊歛昏  
凡百執事肄習彬彬戊辰齋居彌竭精純昧旦盛服天  
仗肅陳爰趨殊庭溯瞻九閔眷我道祖凝神窈冥濬發  
靈源流福無垠旋蹕清廟感惻蒿焄端冕對越秉心著



存暨入禩室有涕其零儻若有見愜如有聞景緯陸離  
瑞靄輪囷乃備法駕玉軼金輪蒼龍載驅和鸞鏘鳴黃  
纛恒畫翠黼梢雲還復齋寢以須肇禋重屋啓邃八牖  
徹扃拮席純敷蠟炬交熒金石森列豆籩苾芬有雨其  
霂激電震霆先事以戒升奠而停皇心益祗惕若持盈  
上帝降鑒富媪式憑二后嚴配五帝侍軒陞級陟降食  
飲樂欣禮儀既備廷列九賓宣旨輟賀免御端門天降  
威靈寧不震驚省咎宸扆肆耆八紘相古肆祀酒列牲

駢託物薦忱惟德之馨玉帶之圖奉高所營蓋第園水  
入自崑崙辯說踳駁舛厥本源若稽皇祐裁自帝尊合  
祛參侑不瀆不煩維時泰和穆穆迂衡尚勞聖慮抑加

鴻名制詔皐已千古日星

皇祐手詔引答項者星躔舛  
歷水旱沴和人適存饑物非

備順方軫納蝗之  
念彌與罪已之懷

其在於今履運艱屯經躔錯度水旱

洵臻寇盜虔劉公私窶貧國論輻輳政條放紛所宜急  
急補壞支傾皇帝明哲問學日新夔夔翼翼是究是詢  
廣內九重方丈八珍采翠眩轉尊疊溢醇皇情泊然堯

采若顰沓來封章敷列典墳肝不遑食坐或達晨雖躬  
其劬未凝厥勲因饗而思咎證之頻天誘帝衷躋之乾  
淳天啓神斷旋乾轉坤抵龜蔽志啟號列紳若古有訓  
股肱惟人進退以禮艱哉選掄匪余則私弛弛必更皤  
皤一老為世重輕毋徐其驅擾我心旌奚蠹莫理奚墜  
莫撐孰枉而陟孰賢而湮孰道之同而返丘園遲汝之  
來秉我化鈞莫莫葛藟比其本根有來贊裸麟趾振振  
時庸展親金帛膺膺慨昔急難在原眷令豈不爾矜義

或奪恩蓋考故實以厚人倫言路之闕公論以信誰室  
其來歲久積堙亦既疏淪源清則亨毋厭其鯁而其佞  
言藥石我愛醪醴我醒好惡之歧治忽以分民亦勞止  
魴尾其頰託之守宰爾撫爾循邊以警聞皇皇算緡吏  
緣為姦星火急征慨彼嘉殖耗於騰螾戢貪禁苛前令  
蓋申祁祁中原百年荆榛天狼耀芒較昔則獐獐我邊  
關殲我邊氓汜可小休亦人之情儻得少暇修其政刑  
毋寧翫愒以縱鯨吞維是四端急甚救焚天何言哉警

戒諄諄仁愛之心與父母均皇帝曰咨爾公爾卿其左  
右我以經以綸鼎雉申儆中興有殷雲漢懼災王化復  
行維思無邪負辰有銘敢不參倚日省吾身我闕汝規  
毋我逢迎淵冰虎尾始終一誠神示神考寧不我聽百  
臣司絕虔恭駿奔跪誦祝冊如帝其聆式稽周頌進戒  
九閭敬之敬之母圮於成海深岳崇不廢消塵圖易於  
艱渝險而平天錫帝壽如古大椿天祚景運萬億子孫  
臣雖不敏知力於文泚筆以俟夫歌維清

五言古詩

遊靈隱寺

夙好在巖壑強持縛纓簪野性當奈何  
惆恍如驚鷹京華百萬家  
臍臍瓦疊鱗海氣蕩煩暑作威凌  
轢人湖山招我來九里松  
風清稽首靈鷲山西瞻目若營云何  
一峯碧飛來如羽輕俗見圓畛域  
達觀渺沙塵不見毗耶離示病老淨  
名古掌斷世界猶如陶家輪竺慧去不返  
雪猿呼莫聞斯言誰與證萬壑空煙雲  
老禪法龍象談

塵紛縱橫萍蓬萬里外  
繾綣猶鄉情齋盃乳鋪玉茗椀  
花糝瓊兩腋扶清風  
取意巖壑行冷泉掬清泚五峯凌  
崢嶸真賞味無味內觀湛空明  
可能一枝筇雲水自由  
身永愧隱峯老勇決拂衣巾

連日快晴登金華菴觀大面諸峯

齋心謁殊庭異境目力眩積陰疑漏天  
媧石誰與鍊列仙喜我至一笑晴景現  
絮雲斂太空螺翠敞大面正位儼宸極  
羣峯拱星弁煙雲互吐吞草木鬱葱  
蓊錯磨金

碧麗裝積霞綺綯平生飫看山及茲頗創見常聞西城  
君承詔通明殿玉虬層空來寶室仙境擅真侶萬五千  
朝夕侍游燕凝神杳渺間稽首辦香薦條看碧瑤岑空  
起白雲片溟滓含一氣瞬息閱千變意恐大隗迷或作  
巨鼇抃仙者奚異人豈忍為獨善利欲膏火熬是非蠻  
觸戰持是以求仙何異沙作饀吾身信浮漚世事如掣  
電本來一晶明初不假方便隨緣聊爾耳可使為物轉  
寸田須鋤耘老屋亟營繕行迷及未遠補過以無倦颺



游如有聞印我本誓願他年童初館或可備精選

古碑塔寺改律為禪鄉大夫招凌雲智禪師主  
法席規模就整侯丞用晦為賦揭章和者成軸

書來索和

智禪生我下稚齒希空門落髮受具戒持鉢巡諸村有  
如摩尼珠炯然古井渾又若大明鏡不受塵垢昏哀世  
不見理窺天於覆盆誓將昌祖道特用報佛恩得法歸  
燕社閉口不復論眷言古叢城往事空劍痕誰規此浮

屠峻極壓厚坤意令五濁海親見兩足尊末法禪販盛  
遺教髣髴存破律會十方有詔下九閣法席遴厥選爐  
香冷復溫豎拂集龍象催粥乳鯨鯤能使幽衢暝豁開  
若木瞰空花眩俗眼孰辦牢脚跟斯道許津梁如天柱  
崑崙施金方山積巧匠猶水犇請以六度法為拔六欲  
根諸君快說偈羣魔驚褫覓何時共峻陟層霄疑可捫  
勿謂蟹井小可敵鯨海吞

投龍寶室洞天過延慶觀訪王倅共父劍峯精

舍

壁簡薦寶室襟裾馥旃檀眷言石交舊可憚脚力酸層  
崖一劍裂陰壑千古寒數椽棲泐寥小樓面巘岼風穴

激虎嘯石洞掀龍蟠

共穴開一風穴并鑿開一古洞之中得小蛇如筋

是日朔

吹慘舞空雪花漫開尊聊暖熱茗蔬勸加餐心事喜我  
同晤言藹清歡欲去有餘戀小駟搜奇觀評畫過神品  
誓鬼猶故壇君家古叢城甲第十畝寬胡獨嗜幽寂而  
樂茲考槃戍邱漸相迫住山殊未安春風動倅馬雲霄

插雙翰儻念猿鶴怨無多貪熱官

羅僊宮道士留午飯後徧覽山中佳景三十六

峯羅列几席夜雨達旦客枕甚清

老樹萬安驛古井羅真山玉虬五雲車僊翁此往還雲

蹤久不刊汎景疑可攀憶昔攜藻類題詩揭松關

此指羅江

縣真宮事抱琴唐昌來快晴春物妍截竹倚伶俚傳引袂飛褊

褱歷階一稽首為我展笑顏善救無棄物廣度隨有緣

殊庭遙相望異關非浪傳道士多野朴山肴親潔蠲披

榛為前導，斟酒勤款。延墨池鑑，寒藻書臺。滌非煙所著，  
何隱帙，乃忍慳。不傳空餘六六峯，可想格筆椽。最憐覆  
孟亭，秀出層巒。顛周遭碧霞嶂，莽蒼雲海，連酒困擬河  
酌。花坪夏連娟，暝色阻窮探。夜雨得佳眠，塵緣一相悞。  
凡骨何當僊，雲霞豈不戀。簡書當趣旋，神丹夜澗火。青  
藜洞中天，僊翁如點頭。未忍甘棄捐。

過金堂迂路登三學山李八百仙人道場

失脚塵土窄，謁歸自朔暫。迂徑款名山，攀險得幽翫。平

川開靄杳長江遠疎散驅車松柏陰闔戶風日淡棲居

規制古殿壁丹青暗

樓制極古而工夫精麗殿壁畫皆唐人作

仙翁李八百

曾舉陟霄漢遺跡古未陳見我若笑粲靈液噴幽虫枯

楠茁新幹

皆山中事

黃冠肅延勞綠茗勸澆灌飢腸殷雷蟄

塵慮忽冰泮碑閱唐隸道詩為處士歎三生學精苦一

日升汗漫

觀中唐碑最多有處士送崔鍊師詩刻石存焉三學山據碑刻中所載以李八百仙人三

生學道乃登仙故以三學為名

我豈無宿緣心猶憫世難思見甲兵洗

永息氈毳悍王度式金玉民勞拔塗炭偷然一儒腐不

自省踈緩強令事馳驅終覺窘羈絆何當脫屣去託跡  
煙霞伴宮洞吟步虛丹經嚴靜觀太初以為鄰巧歷那  
可算松風天未來為我發永歎

擬古二章

剛風軼飛浮叢霄隱寥潤其上仙者家俯世塵漠漠慨  
我志遠遊幽思無與豁披雲一長嘯曾舉騎鞚整袂  
謁靈君授我一丸藥侍宴旬始宮從遊紫虛閣琅函閱  
道帙許我抽玉鑰玄期記三生廣度有夙諾世氛日頽

洞帝念慘不樂願借萬里風從君駕鸞鶴鞭雷揮斗柄  
夔固併繫縛掃清六合塵景象回閭闔帝命不可稽侍  
晨司校錄永劫保澄明何問癡仙愕

霜英瀟雲母月華吐幽魄瀆房鎖歲蕤弄杵夜咿軋天  
寒日苦短篋不貯寸帛嬋娟空自妍襟袖無乃窄停機  
掩孤頻欲歌心已咽積此萬縷工織成苧羅白蹇修來  
何時復關滯塗轍女無終不嫁謹勿昧所擇忍寒青瑣  
窻熏麝翠羅幙粲粲雙明璫團團雙白璧稚齒昔所娛



翫之不能數春風蕩繁囿觸眼會良匹擷芳索幽占兩  
美斯有合及茲歲未晏為君媚芳澤

人頭山肅謁石壁清源真君像

人頭接劔門濯濯危髻綰一峯表獨立層崖平若剗有  
一偉丈夫遠莫辨眉眼異聞驗清源奇質自天產三生  
舊緣契邂逅一笑莞江流怒未平父功子其偏坐令老  
龜縛笑看離堆鏃陸海擅兩川利百倍灞澹神聖杳難  
詰事或載編簡明德遠矣哉椒漿酌盈瓊

鹽亭登高山廟

曉馳光祿坂暑憩鹽亭縣差我山疊雲窈窕溪橫練長  
憐少陵叟浪走天涯徧耿然憂國心甘作忍飢而世難  
今畧平軍行余後殿憑高慨往哲欲去有餘戀

景行堂

斯文一綫流伊川師弟子萍梗記經行丹青肖容止升  
堂如有聞虛心探厥旨毋與時俗競溺心於口耳

貫道堂

道秘不可傳非文無以貫君者聖畫易風行水上渙誰  
令擊悅工能使雅鄭亂六經日麗天諸子雲霧散

逢源堂

務學有彛訓左右逢其原後生巧穿鑿未派迷本源世  
不有先覺誰當警羣昏佩衿來于于千古師道尊

卧龍亭

隆中抱膝吟意豈慕聞達翻然起潛蟄了不愆宿諾廢  
興渠有命忠直理難奪出處士所重羞死荀文若

小亭

道義日羣居閒暇一游息小亭擁芳榮長江鑑空碧風  
雱不盡春庭草有生色習學自孔氏深體而默識

題枕帶雙流閣

層樓架浦牢其下表奇觀江連內外流山列遠近案烽  
火日平安煙霞奉娛翫蔽芾南國棠挺特九秋幹

圓嶠

羣峯最高處一席如鏡平煙霞敞松牖風月棲茅楹仙

姑紫綺裘飛步白玉京揮手一長嘯四海風塵清

水雲天

樓臺錯圖畫高低各雲煙小車倦登覽危欄且回旋滄  
波納暝色溟濛同一天此中有真賞題詩謝雕鐫

解纜凌雲快晴

淫雨三月賒點篷今夕止蕭晨企璇漢微雲散霞綺鳴  
綠澹不波腴翠淨如洗吾行及端月餘寒未云已何以  
寫幽情無多佳句子

舟行過昭化望遠山秀色東幕中諸丈

劍北山嶺坼刺眼亂矛戟煙雲借光景稍覺含秀色倚  
檣寄遐瞻慨我三友益有懷無與晤搔首暮雲碧

重陽陪諸鄉丈遊水樂洞過風篁嶺龍井張飲  
觀兩蘇仙辯才法師像晚憩楊家梅園歸路小

雨

凜秋天氣佳令節天賜沐客居意莫展勝賞諾已宿風  
澹湖不波霧斂山更簇畫舫厭囂喧筍輿恣追逐間尋

水樂洞嵌空韻琴筑煙雲互吞吐臺館適涼燠非無人  
力勝亦自天巧足側步滑青苔醉面爽飛瀑風篁轉幽  
徑龍井鑑寒玉黠堂定未起清風誰與續四海兩仙翁  
三生緣契熟定知明月夜屐響答空谷歸路取名園移  
尊屢更僕凍雨不成泥騶騎未須趣峨岷渺何在萬里  
勞遠目安得天瓢翻盡把邊塵沃文昌德宏毅承旨氣  
肅穆溫雅奉常卿忠憤膠庠博宮講靜有儀正字竭忠  
告而我贅其間自省羞樸檄明堂索桴楝底用采卷曲

平生邱壑姿本不耐羈束撫事長鬱陶臨觴轉顰蹙故  
園俯大江繞屋藝嘉木何以娛歲晚籬落森杞菊糗糧  
幸有儲那不返耕築

同王萬里山行

邂逅非宿期意行得奇眺三生湖山緣青眼不改舊飛  
榜漾湖光躡屐梯雲嶠玉立緱嶺仙灑落我同調冲懷  
寄寥濶塵外恣吟嘯眯目東華塵誰識此中妙吾儕骯  
髒資如痼不可療溷溷渠得知不自恥牛後已矣毋復



言恐貽水仙笑

次李晉仲同遊南巖韻

風林舞霜葉野水收寒溪旭日愛清美良友欣招携近  
遊南巖麓遠躡樵人溪世未變野處地已呈根題鍊石  
既有穴補天亦餘梯仰睇磴可涉窮擇日從低窅深有  
神護險絕令心悽我歸期再出後會豈終睽第膺三接  
寵未許尋高棲

晉仲文學淵邃方為朝陽鳴鳳僕所次前韻及

之而海賜佳章招隱敢再次韻以反之以資他  
日重會一笑

丈夫為世用釣築辭巖溪不用身徇道固可卷而攜侃  
侃紫陽翁不踐桃李蹊淳熙用不終歸遂此留題坐令  
南巖高萬丈誰能梯倘止論茲山僅亦培塿低今如峴  
首碑千載令人悽我輩何適莫但觀道合睽鳥獸不可  
羣仲尼非棲棲

遊涪州北巖

恭惟同出自斯文其在茲白衣帝王師古聞今所疑慘  
澹涪江濱煙雨寒無炊一編洗心易後學之著龜學禪  
譙夫子窺牆胡不麾茲道貫三極何曾限藩籬柱史接  
武來相望幾何時舊隱勤汎掃大書挺雄奇江山著羈  
臣千古同一悲渠自氣浩然何成復何虧高堂儼遺像  
寶墨鐫豐碑往者不可作搔首空涕洟蕭蕭北巖松悠  
悠我之思

和江平叔遊無為山詩韻

風嗜一邱壑誓言苦難踐夢踏西山雲陟降原復嶮世  
紛不可耐道根日以淺永愧龕中定三歎涕如霰君從  
柯山來行盡蜀山險不憚屐齒蠟恣褻蘭亭繭毫端花  
五色優曇時一現脩脩塵外趣歷歷眼中見人生歡會  
少搏沙隨手散何以慰瞻思英詞展黃絹

自道場山至何山讀故人洪舜俞內翰詩刻追

和

褊性不諧俗泛梗歸無家故人右扶風雙旌擁崇牙款

門及暇日褰裳躡飛霞維南古道場諸天集毗耶魏撐  
鳳騫舞岌起龍騰擎坡仙舊詩刻清芬郁天葩雲表塔  
標峻具區颿影賒萬象森湊泊窮探忽鎔鈇金輿度窈

窈

何山一  
名金輿

翠幄巧蔽遮昔賢此幽棲禪扉寂無譁蕭爽

萬竿竹芬甘一甌茶清泉茁蘭茗黃粉飄松花意疑人  
境外身漾天漢槎浮生能幾何驚智那有涯神龜寶巾  
筍曳尾寧坳窪所嗜在閒曠何心事雄夸洪崖石交鴛  
歲晚蔗境佳心源秋水澹藝苑春容奢冢上木遽拱海

山棗如瓜今古一轉燭聚散猶搏沙暮江趣浮鷗城樹  
喧棲鴉願言借一窻爐香緜楞伽

連日駐白帝城懷古感事閱陸放翁詩集追和

其韻

益以搯為國前後闕兩門劔棧徑偏側峽江浪崩犇盤  
礪六十州奠位西南坤天險豈輕設參旗寧易捫我行  
當巖冬岸沙高漲痕絕壁走獮獍深潭伏鼉鼉東逝注  
滄海西來非一源相傳石筍三下接灩澦根長懷草廬

公受遺龍準孫志節局不展德義深可尊矧伊躍馬壯  
得與同日論形勢今猶昔世故難為言撫事重感慨遐  
瞻莽塵昏空餘灑西東未泯冰雪竟臘殘春意動清波  
躍河豚搥鼓趣下峽渚宮同一尊

中元節日登舟赴官巴西兄姪偕親友追送三  
十里乃別相顧悽黯舟行得此詩以寄

隨牒倦塵土歸夢長紛紜及歸歲阻飢負米良艱勤細  
摹食粥帖長歌送窮文忽捧毛生檄往擷魯宮芹元方

與猶子念我當離羣折東期諸彥褰裳集江濱追送三十里酒炙羅繽紛夜航語達旦摻袂俄夕曛汀蘆黯回首風萍悵輕分時危事遠役所遇無一欣元戎調新律笑談靜邊氛容我坐無擅我冠誦皇墳采蘭勸加餐伐木友多聞諸君志媵修未可恬耕耘努力崇令猷時來皆青雲

弔齊齋先生尚書文節倪公

公以正學清文精忠謹論為先朝名侍從玉



色山立百士望而沮懾故身退而名益高浮  
玉山碧浪湖吳興勝處規創書院來往宴娛  
雅慕雪堂老僊亭館皆摘詩句為扁榜某之  
生也後僻處岷山不獲順下風而趨幸與先  
生之季子新安使君理正子武同朝為三益  
友會以口語去國扁舟訪子武為置酒相羊  
水石間清風勁節岌業與衡弁競爽矧承家  
惟肖先生固有不亡者存子武謂是行也不

可無記述偶閱坡集峴山亭飛英寺分韻月  
明星稀四詩借率借韻語拙不工姑以抒其  
惓惓企慕之意云爾

披襟白蘋風蕩槩碧瀾月若下酒可斟顧渚茗堪啜茲  
遊足娛翫所遇皆勝絕四海齊齋翁清風傳奕葉平生  
心本朝我冠蓬怒髮子皮五湖棹煙波時出沒

仕道昔有訓退處非為名齊筭醉聒耳虞絃自希聲清  
波貫雲蒼空翠浮弁衡圖史足怡悅風月無將迎生世

我已後景行寧忘情昂昂雞羣鶴慰我雙眼明

萬頃湖浪碧一點浮玉青先生此考槃有道甘沉冥植  
柳蔭水檻栽蓮繞風亭感慨手遺奏精神超列星鴻鵠  
既層舉鷄鶴爭刷翎克家類季子隧碑新刻銘

風塵日騷屑者哲晨星稀九原不可作斯文今誰歸臨  
風想孤標把酒哦落暉扁刻見尚友雪堂密傳衣歸帆  
拂蘋波晴煙抹松扉滿篋貯寶刻展誦省昨非

劉園

春來雨雪連綿仲月之二日夙興快晴急借  
小舫欲過沈氏大小玲瓏岳怒風簸揚撐入  
小港舟子告以劉園近在因往縱觀乃戊戌  
舊遊也花竹逾茂亭館加葺尤覺奇偉徘徊  
抵暮始入城先時結束書籠偶案上白集一  
冊是日早信手繙閱中有和夢得洛中早春  
見贈七韻末句云何日同晏遊心期二月二  
茲行本非夙戒而偶與白詩參合小小嬉遊

亦有數耶因追和其韻

陰沍閔陽和快晴差愜意怒颺妬心賞清遊殊鮮味繫  
船枯葦叢悶損兀坐睡斷港麴塵波見引著勝地逕梅  
佇攬結堤柳是才思尤憐石交舊勸我取一醉異事詫  
白詩偶同二月二

贈修水黃君子行

黃君以元祐太史公之諸孫寓籍分宜苦志  
於詩以蓬甕寐語名其集長篇短調不主一

體敷腴而雅重瀏亮而奇崛使讀之者如遊  
羣玉府百珍眩目未暇覩也庚伏袪熱惠然  
再臨贈五言古體二十八韻清風披拂袖間  
念宿諾不可負而遽徑曹侍郎三山陳廣宗  
韋輔江彞叟之序引固無可復加因次所示  
詩韻贅附編末云

雨潤草野犁水給漢陰甕一為大烹鼎玉食此焉供一  
如朽木偶肯受關索弄顯晦勢則然達觀等一夢可憐

蓬窳生萬卷皆成誦靜退一何勇本不借慙慙使孔孟  
復起必能與折衷世道日以隘古心誰與共君家太史  
公以文瑞吾宋崛奇莊騷語雅淡商周頌學力探窟深  
天巧妙機綜風流被諸孫璆琳富包貢若若綬滿朝從  
從清燕奉那知一畝宮有士苦唵諷寐語甘自怡經綸  
付時棟伊余曩在列竊自恥陰拱斥去職蕃宣翫愒  
廩俸何階繆推激為我破愚蠢由唐及國朝作者亦已  
衆元氣所融會諒亦勞藝種苦心欲其工何者適於用

當知正始音若睹治世鳳覽輝千仞岡一洗羣目瞽謏  
聞我自知可能相引重乞閒會得請敢覬百錢送假道  
願款門單車屏徒從不妨蒿藿逕容我於二仲秋風來  
有期心旌轉飛動

和景韓贈子敬末章韻

艷冶昭陽妃嬌好浣紗女盛時一轉盼零落委黃土彼  
姝秋胡婦真節甘獨守煒煒編簡上芳聲乃持久我欲  
呼緒風酹以一觴酒君看澗底松閱世幾寒暑丈夫要



如此千載可尚友鬼域玩阿瞞何妨糝搗鼓平生書五  
車一字不堪煮愾我左右手雙顧石棱紫忍窮學師道  
覓句迫徐俯橫陳味嚼蠟下筆迅流水憶昨涪江濱對  
吟夜床雨胡為輕判袂愁凭烏皮几人生如飛蓬飄落  
無定所那知錦官城尊酒又同舉草玄幾垂絲筆力造  
化補自我交斯人短翅思決起不因得趣同那覺同心  
苦至今浮山夢歷歷西窻語齋厨厭苜蓿塵甑窘禾稊  
忍飢搜枯腸數息保氣母何當陪勝賞一醉詩分取終

恐吃期期輸君白玉塵

唐文權郡見前作和韻見教乃賦詩三首以答

之

陰陽無停機寒暑迭更代迅商俄慄慄炎官亟斂退巖  
壑有餘妍雨晴皆可愛迤迆紅塵海適喜翠屏對

魯國久仙去詩偕芙蓉秋淵淵韻金石往往餘巖丘象  
賢來題輿同聲應鳴璆清渭發源遠濁涇難混流

贊房容久愒遊子奚所嘆樹老晝常寂雲埋宵易寒龕

燈對青熒手篋失白團撫運忽有感秋防趣三單

宗博宮講何丈以諸賢所賦清賦堂詩軸示教

借和元韻附軸尾

避影惡木陰忍渴貪泉水君看象渡河步步須徹底士  
當秉持操盛行貴知止佳境著蔗根苦或起瓜蒂上尊  
錫方進萬事咨伯始孰能超然觀貫之以一理瓢飲有  
餘樂我自味無味憶登君子堂積雪幾沒趾雙鶴舞前  
除穢煙縈素几疊石肖嶮岬俯檻鑑清泚旌招還此來

歸夢曷能已紅塵交纏語新律吐瓊藥千載友元亮顧  
未忍違世將壇建鼓旗許我陪末至政恐如濁涇難以  
汨清渭俗氛日鞦韆菜苾亂蓀芷為君歌停雲倦翮思  
決起念歸悵無家素食心所恥安得三間茅託身安穩  
地一編岫雲吟枯腸或能擬

題夾江馮臨父玉山莊圖

後溪劉先生為題小絕故秘書郎薛公賦長  
篇今益部祥刑秘閣張公屬公許賦併呈山

房邵傳中康節曾孫也

天下最佳處惟二室三川一氣所融結何地無雲煙憶  
遊古南安倦憩大觀前十洲與三島渺莽雲水連追隨  
子邵子飛步山房巔醉歸迷夕靄笑歌呼渡船至今詩  
篋中秀色餘芳鮮永願借一壑抱耒耕石田不學谷口  
隱姓名京師傳邂逅大馮君為我開愁邊煙霞粲畫本  
風月起筆椽上有玉山莊遙挹嵯峯妍士為聲利役何  
如擁腫全脫粟幸可飽苦荼宜活煎畫計不用決與山

終薄緣三間苟完矣萬松想蒼然羊腸推君輶問君歸  
何年早逐山房翁江郊掉吟鞭往來成二老日醉壺中  
天對峙五言城寫之七絲絃勿遣俗士駕汙我青苔錢

